

中國方志叢書·華北地方·第四七二號

據

清·趙開元纂修，暢俊蒐輯
乾隆十一年石印本

影印

河南省

新鄉縣志

(四)

成文出版社有限公司印行

中華民國六十五年

月臺一版

新鄉縣志

全四冊

發行人：黃 成 助

出版者：成文出版社有限公司

台北市郵政信箱二二六〇五號
台北市羅斯福路三段二四〇巷五號

印刷者：成文出版社有限公司

內政部登記證內版台業字第一一四七號

新鄉縣志卷第二十七

邱墓志下

國朝楊文秀墓在縣西五里高村

薛所蘊萊竹楊公墓誌銘公諱文秀字右君號萊竹水部主政東始之父世居新鄉西城父曰朱夏公通詩書能文章敦厚溫醇古石奮張叔之流也乃恂恂以孝弟力田終其身三子公最少氣貌瓌瑋言動不苟父異之年十六慨然發憤謁賈先生下帷讀書賈奇其志而教之三年歌在泮稱一黌之雋胸懷磊落於家人生產泊如也每讀史至古名臣如張釋之于定國諸君子未嘗不反覆吟翫想見其人故樂善喜施尤好爲人排解紛難閭里不能自給者濟之事不得其平者以身直之崇正己邅流寇壘中原邑侯登陴捍禦公躬親指畫倡議修甃撫軍上其

事賜褒嘉焉兵燹後士多徙業公課子不少懈乙酉大比士東始領鄉薦丙戌捷南宮公猶以治理未嫻仍命讀書孝經世典故傳云子之能仕父教之忠公殆行古之道與丁亥東始對策成進士授江寧司李公曰張釋之爲廷尉獄無冤民于定國爲廷尉民自以不冤古今賢之爾職刑民與廷尉等其無忘爾父言隨之任東始每出鞠事退必問今日治何獄平反若何當則歡笑異于常時有弗當輒怫然不樂東始亦體公志小大之獄必以情繡衣使者至嘗秉燭治爰書公曰人命至重死者不可復生勿憚勞我爲爾檢之情可矜疑者一一指出俾解網牒上臺使聽之得釋者八人今江左嘖嘖稱揚司理遺愛比于鄭國僑公之教也以覃恩受封如子官癸巳東始遷水部主事公歸里踰年疾作時水部有造舟淮上之役疾馳省視未至而公遽

卒易簣惟篤念水部遺教以作忠云時少子及二孫在側公視之曰讀書爲好人餘不及私彌留之際有治無亂誠古人所難也公生于明萬歷辛巳七月十日終于國朝順治甲午十月七日年七十有四公配董孺人生二子長卽毓蘭丙戌進士工部屯田司主事娶戴貢趙時英女封孺人次佩蘭廩生娶儒官楊汝梅女女二長適庠生呂好儒男麟徵次適生員蔣人吉早卒孫二長滌聘廩生張鳳起女次徵聘乙未進士周嗣昌女孫女三長許聘廩生杜于花男肇碩次許聘增廣生員孟克類男銑三許聘廩生郭治華男宗彝卜以順治十二年十一月五日塋公于高村隆岡之南銘曰伯僑之裔因采氏楊睦茲哲人徽德孔彰有子能仕作室肯堂察獄以情江表稱平恩綸載頒三錫攸榮

郭士標墓在縣北二十里魯堡

李振裕中水郭公墓誌銘公諱士標字公望別號中水姓郭氏河南新鄉人也其先自明初有諱欽者始居邑之定國村歷四傳至孔嘉是爲公高祖考孔嘉生名山縣主簿千之千之生蘇州府同知蒙古吉生四子其次曰渥明神宗朝爲禮部尚書李曰澆仕至陝西布政司叅政公第三子出後尚書公以廕爲官生郭氏故世族尚書公兄弟皆以進士起家貴盛甲其里中子弟多翩翩自喜公獨深沉有大志自命偉然不屑爲貴游豪縱態其師易義侯張公亮諸君皆嘆奇之年十八尚書公歿居喪盡禮持身治家斬斬有法度繼念尚書公未膺卹典伏闕抗疏陳請卒得俞旨賜祭葬如例人以是知其能無何叅政公受命分守河西是時流寇猖獗秦中大亂叅政年已老其長子失

嬰弗克從將單騎之任公蹙蹙曰當此寇盜充斥時柰何令老親獨往吾輩顧優游家食乎卽從叅政公赴陝至則日夜籌畫思所以撫柔百姓捍禦盜賊叅政用其言勦賊屢有功旣而寇入河北叅政以鄉里爲憂公則復自陝馳歸佐郡縣吏繕完城池修甲兵召募壯士爲守禦計一方賴以安堵寇旣退有司上其事於朝以叅政公名奏聞愍帝賜璽書褒美叅政公寔宦遊未嘗知其事也居二年叅政卒於官二子相繼歿公益孤立無所倚而大河南北仍賊大稷家業日以衰耗盜賊並起滋益多州縣多被剽掠公以一書生外爲鄉里謀扞患助其芻蕘糗糧內庇家政代兩兄撫藐諸孤衣食百須雜然待其咄嗟指麾無不辦具當是時也人咸以經理之才屬公公亦慨然自負留意天下事思出其才以有爲然終以不遇而賊勢益張國事益不

可收拾洎李自成陷京城愍帝殂公遂絕意進取其才卒不見
於施行君子蓋深惜焉公素有志聖賢之學自其從叅政公在
陝雖軍旅倥傯時暇則相與議論經史質疑問難不少休旣絕
意進取乃益肆力於學問家居日取五經諸子下逮宋儒語錄
沉潛反復究厥指歸擇其純粹者纂而錄之都爲一集會容城
孫徵君奇逢僑寓蘇門公出所學相正徵君一見傾服議論往
復多所符契始公雖力學不倦猶自以無所師承未敢堅信不
疑及是乃益渙然無所惑也其學不自表暴以力行爲先務于
孝友睦婣尤所加意事母及本生母兩得其懽心數十年人無
間言本生母卒降服心喪三年如古禮撫幼弟若兄子授產授
室與已子均厚于宗族建祖祠墓側歲時祭掃大會族人習禮
其中置祭田以供饗祀有餘則以供族人嫁娶喪葬費立家會

集族之能文者月一課之又擇其文之優者令分教族之子弟
縉紳家傳以爲法孫徵君稱公爲六行之士聞者僉曰無愧若
公者所謂不言而躬行者歟公雖終身隱約其才莫克自見而
學問深謹內行醇備實足以垂法後世至其仁義之心遇事輒
發時時罄所有賑人不贍鼎革以後士人或轉徙不能歸予道
里費令復其所婦女爲兵掠者贖而歸之其利澤之及于人者
蓋亦不可勝數也嗚呼是足以觀公之大槩矣公生于明萬曆
三十三年乙巳七月初一日未時卒于康熙二十六年丁卯八
月二十三日酉時享壽八十三歲元配呂氏繼娶余氏陳氏子
男一人晉熙戊午科舉人陳氏出孫男二培恒培恪今將以康
熙三十一年壬申十二月初七日葬公於魯堡祖塋詮次公行
事來請余銘惟余叔王父忠肅公出尚書公省試所取士當尚

書初歿時嘗言公於喪次一見嘆為遠器時時向人稱道之余
自幼至今聞公名甚熟故按狀所言書其大畧如此至于公抱
用世才寧隱約以老終不復思一試其志有可悲者公不自言
其故余亦不得而詳也銘曰猗歟郭氏代有顯人公產華胄其
才莫倫耻彼鉛刀厲我鋒鏑卒韞不施以昌其學教行于家仁
溢于里身則隱焉德既茂只鑽石埋辭鮮稱厥情維公靡愧後
其有徵

任文晔墓在縣東二十里關家堤

張縫彥墓在縣南五里孟家營

劉正宗文學張公暨配合墓墓誌銘公諱縫彥字洙源九莊其
別號也世爲衛之新鄉人自齠齔承父別駕公庭訓蚤遊黌序
負文名每試輒冠性欽寄歷落不與俗伍然制行端謹饒蘊藉

孝友天生弱冠時卽爲鄉黨所推萬歷間中州學使者陳聖苞
曹根遂皆號知人皆賞識恐後曹初至衛詣學宮開講語諸生
曰吾入郡得奇士不覺色喜因口述文中佳句公卽示儔人中
出應一時譽望大振邱毛伯侍御觀風河朔拔公爲六邑第一
徵長百泉社中諸名宿無不避席讓之公胞弟司馬坦公先生
少公八載初習舉子業皆公砥礪相成辛酉魁于鄉海內人士
仰之如山斗而不知其家學淵源蓋有自公五試鄉闈俱不
偶爲時論所惜公亦自謂非戰之罪益肆力文章不問家人生
產買書種植花竹閉戶自娛坐此囊常滿公處之泰然也司馬
公筮仕內外值國步多艱不遑將父公從別駕公歷太康武陟
兩邑司訓色養備至讀禮服闋旋遭寇變公以避地江南不及
難歸後遂無志進取卜地茹岡構嘯風亭放情詩酒與邑中文

學數人結蓮社相倡和爲詩法少陵風格道上無時習纖趨尤
樂百泉之勝有聽泉諸咏置之盛唐中莫辨也辛卯冬余奉使
過新鄉往返兩晤公皆促膝談詩至夜分露醉乃罷公省宇多
英氣而絕口不及時務似有意自晦者余返長安每向司馬公
道之始知公富經濟已卯冬歲大饑上發帑金賑濟公代長吏
譟畫有法煮粥施藥活數萬人然感慨時事循資應以明經薦
不就當事欲授訓導亦不就嗚呼公真有所托以自全者矣癸
巳春公病卒于家嗣君中翰欲含已得請終養而聞訃音余甚
傷其意以銘見托何敢辭公生萬曆辛卯十二月初九卒于願
治癸巳二月十四室李氏生于一欲含中書舍人詳載司馬所
傳誌中合墓王岳營平原銘曰士負奇情得天爲多豐天壽人
匪數伊何矯矯九莊早宜賓王沒齒家食匪狷匪狂吟壇歷歷

追少陵氏洋洋衛水公何嘗死 薛所蘊洙源張公墓表載在
癸巳二月十四日新鄉洙源張公以疾終于正寢訃至京師令
嗣中翰君匍匐奔喪去比抵里走使贄幣請於新相國渠邱劉
公文其壙之石而屬余表厥墓余季子穎生娶於公弟大司馬
坦公與公固夙敦姻婭好也爲諸生時卽讀公文今逾三十年
所矣生平可謂不薄安得以不令之詞辭乎公諱縫彥號洙源
一號九莊先世自晉洪洞徙新鄉遂爲衛之新鄉人世篤隱君
子之行逮公父封都諫真定通判心吾公乃以文學顯公仰承
過庭之訓志業精專於書無所不讀爲應舉業尤典蒼高妙試
輒前諸生督學閩陳聖苞師當塗曹根遠師爲海內文章主盟
尤雅重公文初曹蒞郡學集郡邑長博士弟子前告曰吾入衛
得一奇傑士喜而不寐卽舉文中佳句相示則公文也中丞邱

毛伯爲柱史時出按兩河時進諸公而課業焉旣以高文自喜
負衡鑑精嚴慎評可凡爲藻績豐滿之文飾有司目待前茅者
皆殿置之以爲齷齪猥鄙折楊黃荇耳無當古作者之意乃獨
於公文深加歎賞拔冠七學立百泉社朔望次其藝咸第一以
爲常是時兩河人文爲之一變而公文名亦遂子子然樹漢赤
幟於蘇門衛水間矣公弟大司馬同以能文著乃大司馬弱冠
中高第歷顯仕而公數困于有司僅用明經薦士林爲之搢臆
云先是萬歷乙卯歲大饑神宗皇帝發帑下有司賑貸公爲長
令條上機宜民賴以全活甚衆甲申流寇犯都城大司馬羈京
師公奉繼母胡太夫人襁司馬幼子間關南避脩歷危險多方
調護得免於難會大司馬入黃麻山中糾合義衆爲歲寇復讐
之舉公走金陵保眷屬遙出奇計佐方畧東南半壁爲之響應

若公者其智畧豈不有大過人者哉當事者擬授東陽司訓辭
皇清受命趣大司馬北赴闕公乃歸里起嘯風亭蒔名花美
竹抱甕灌園偕二三老友斗酒高歌陶如也喜爲詩晚而益工
與孟津王宗伯覺斯相酬和壬辰冬猶緘詩一帙屬余與渠邱
劉公共點定未幾輒疾疾之日中翰君請於朝許終養比東裝
而公訃至嗚呼公之學之才如高陵廣淵未能陟其樊而涉其
涯安能測其中之所藏耶使假以位卽其所建豎塤吹篪和何
難伯仲共聲施於竹帛旂常間而卒艱於一第其命也夫中翰
君讀書有志節能繼公志而光大之蓄而未發或者天將侈之
於其後也室孺人李氏前公歿孺人之才而賢賢而知禮不能
殫述詳載司馬撰文中公生於萬歷辛卯年十二月初九日卒
於順治癸巳年二月十四日壽六十有三孺人生於萬歷壬辰

年十二月二十九日卒於順治丁亥年五月二十六日壽五十有六以十月二十二日合葬于故阡封都諫心吾公之側一子欲含內翰林弘文院誥勅撰文中書舍人卽孺人所出也公厚儲而未顯余故表而出之俾後之過其墓者式焉

張紳彥墓在縣南五里孟家營

許作梅魯源張公墓誌銘 皇清順治十有七年庚子八月十一日甲午光祿寺署丞張公卒明年辛丑十月卜葬于王岳營之兆域其子欲開欲翕錄公生平行誼請余銘其墓按狀公諱紳彥號魯源父贈君別駕公有子四伯縫彥明經進士也以子良部郎任內翰林弘文院中書舍人遇 覃恩贈如其官仲卽公叔縉彥明辛未進士任簡討授兵科都諫歷大司馬 國朝山東右轄浙江左轄工部侍郎季繼彥其先晉洪洞人有得山